

# **LETTERATURA EUROPEA DELLE ORIGINI**

A.A. 2021-22

**PARTE PRIMA**

## Guglielmo d'Aquitania

I

Ab la dolchor del temps novel  
foillo li bosc, e li aucel  
chanton, chascus en lor lati,  
segon le vers del novel chan:  
adonc esta ben c'om s'aisi  
d'acho dont hom a plus talan.

II

De lai don plus m'es bon e bel  
non vei mesager ni sagel,  
per que mos cors non dorm ni ri  
ni no m'aus traire adenan,  
tro qu'eu sacha ben de la fi,  
s'el'es aussi com eu deman.

III

La nostr'amor va enaissi  
com la brancha de l'albespi,  
qu'esta sobre l'arbr'en craman,  
la nuoit, ab la ploi'ez al gel,  
tro l'endeman, que'l sols s'espan  
per la feuilla vert el ramel.

IV

Enquer me menbra d'un mati  
que nos fezem de guerra fi  
e que'm donet un don tan gran:  
sa drudari'e son anel.  
Enquer me lais Dieus viure tan  
qu'aia mas mans soz son mantel!

V

Qu'eu non ai soing d'estraig lati  
que'm parta de mon Bon Vezi;  
qu'eu sai de paraulas com van,  
ab un breu sermon que s'espel:  
que tal se van d'amor gaban,  
nos n'avem la pessa e'l coutel.

## Guglielmo d'Aquitania

Companho, tant ai agutz d'avols conres  
qu'ieu non pueſc mudar no·n chan e que no·m pes;  
enpero no vueill c'om sapcha mon afar de maintas res.

### II

E dirai vos m'entendensa, de que es:  
no m'azauta cons gardatz ni gorcs ses peis,  
ni gabars de malvatz homes com de lor faitz non agues.

### III

Senher Dieus, quez es del mon capdels e reis,  
qui anc premier gardet con, com non esteis?  
C'anc no fo mestiers ni garda c'a sidons estes sordeis.

### IV

Pero dirai vos de con, cals es sa leis,  
com sel hom que mal n'a fait e peitz n'a pres:  
si c[om] autra res en merma, qui·n pana, e cons en creis.

### V

E sel qui no volra·n creire mos casteis,  
an ho vezet pres lo bosc, en un deveis:  
per un albre c'om hi tailla n'i naison [ho] dos ho treis.

### VI

E quan lo bocx es taillatz, nais plus espes;  
e'l senher no·n pert son comte ni sos ses:  
a revers planh hom la tala, si·l dampn[atges no·i a ges].

### VII

Tortz es c'o[m planha la tala si·l] dan[nages no·i a ges].

I

Farai un vers de dreyt nien:  
non er de mi ni d'autra gen,  
non er d'amor ni de joven,  
ni de ren au,  
qu'enans fo trobatz en durmen  
sus un chivau.

II

No sai en qual hora·m fui natz,  
no soi alegres ni iratz,  
no soi estranhs ni soi privatz,  
ni no·n puec au,  
qu'enaissi fui de nueitz fadatz  
sobr'un pueg au.

III

No sai cora·m fui endormitz,  
ni cora·m veill, s'om no m'o ditz:  
per pauc no m'es lo cor partitz  
d'un dol corau;  
e no m'o pretz una fromitz,  
par saint Marsau!

IV

Malautz soi e cre mi morir,  
e re no sai mas quan n'aug dir.  
Metge querrai al mieu albir,  
e no·m sai tau;  
bos metges er, si.m pot guerir,  
mor non, si amau.

V

Amigu'ai ieu, no sai qui s'es,  
c'anc no la vi, si m'aiut fes;  
ni·m fes que·m plassa ni que·m pes,  
ni no m'en cau;  
c'anc non ac Norman ni Frances  
dins mon ostau.

VI

Anc non la vi et am la fort;  
anc non n'aic dreit ni no·m fes tort;  
quan non la vei, be m'en deport;  
no·m pretz un jau;  
qu'ie·n sai gensor et bellazor,  
e que mais vau.

VII

No sai lo luec ves on s'esta,  
si es en pueg ho [es] en pla;  
non aus dire lo tort que m'a,

abans m'en cau;  
e peza·m be quar sai rema,  
[per] aitan vau.

### VIII

Fait ai lo vers, no say de cui;  
e trametrai lo a celui  
que lo·m trametra per autrui  
enves Peitau,  
que·m tramezes del sieu estui  
la contraclau.

## Bernart de Ventadorn

I        1 Can vei la lauzeta mover  
de joi sas alas contral rai,  
que s'oblid' e's laissa chazer  
per la doussor c'al cor li vai,  
5      ai ! tan grans enveya m'en ve  
de cui qu'eu veya jauzion,  
meravilhas ai, car desse  
lo cor de dezirer no'm fon.

II        Ai, las! tan cuidava saber  
10 d'amor, e tan petit en sai !  
car eu d'amar no'm posc tener  
celeis don ja pro non aurai.  
tout m'a mo cor, e tout m'a me,  
e se mezeis e tot lo mon ;  
15      e can se'm tolc, no'm laisset re  
mas dezirer e cor volon.

III        Anc non agui de me poder  
ni no fui meus de l'or' en sai  
que'm laisset en sos olhs vezet  
20      en un miralh que mout me plai.  
miralhs, pus me mirei en te,  
m'an mort li sospir de preon,  
c'aissi'm perdei com perdet se  
lo bels Narcisus en la fon.

IV        25 De las domnas me dezesper ;  
ja mais en lor no'm fiarai ;  
c'aissi com las solh chaptener,  
enaissi las deschaptenrai.  
pois vei c'una pro no m'en te  
30      vas leis que'm destrui e'm cofon,  
totas las dopt' e las mescre,  
car be sai c'atretals se son.

V        D'aïsso's fa be femna parer  
ma domna, per qu'e'lh o retrai,  
35      car no vol so c'om deu voler,

e so c'om li deveda, fai.  
chazutz sui en mala merce,  
et ai be faih co·l fols en pon ;  
e no sai per que m'esdeve,  
40 mas car trop puyei contra mon.

VI            Merces es perduda, per ver,  
(et eu non o saubi anc mai),  
car cilh qui plus en degr'aver,  
no·n a ges, et on la querrai ?  
45 a ! can mal sembla, qui la ve,  
qued aquest chaitiu deziron  
que ja ses leis non aura be,  
laisse morir, que no l'aon !

VII          Pus ab midons no·m pot valer  
50 precs ni merces ni·l dreihz qu'eu ai,  
ni a leis no ven a plazer  
qu'eu l'am, ja mais no·lh o dirai.  
aissi·m part de leis e·m recre ;  
mort m'a, e per mort li respon,  
55 e vau m'en, pus ilh no·m rete,  
chaitius, en issilh, no sai on.

VIII         Tristans, ges no·n auretz de me,  
qu'eu m'en vau, chaitius, no sai on.  
de chantar me gic e·m recre,  
60 e de joi e d'amor m'escon.

I        1 Tant ai mo cor ple de joya,  
            tot me desnatura.  
            flor blanca, vermelh' e groya  
            me par la frejura,  
5      c'ab lo ven et ab la ploya  
            me creis l'aventura,  
per que mos pretz mont' e poya  
            e mos chans melhura.  
            tan ai al cor d'amor,  
10     de joï e de doussor,  
per que'l gels me sembla flor  
            e la neus verdura.

II       Anar posc ses vestidura,  
            nutz en ma chamiza,  
15     car fin' amors m'asegura  
            de la freja biza.  
            mas es fols qui's desmezura,  
            e no's te de guiza,  
per qu'eu ai pres de me cura,  
20     deis c'agui enquiza  
            la plus bela d'amor,  
            don aten tan d'onor,  
            car en loc de sa ricor  
            no volh aver Piza.

III      25 De s'amistat me reciza !  
            mas be n'ai fransa,  
            que sivals eu n'ai conquiza  
            la bela semblansa ;  
            et ai ne a ma deviza  
30      tan de benanansa,  
            que ja'l jorn que l'aurai viza,  
            non aurai pezansa.  
            mo cor ai pres d'Amor,  
            que l'esperitz lai cor,  
35      mas lo cors es sai, alhor,  
            lonh de leis, en Fransa.

IV       Eu n'ai la bon' esperansa.  
            mas petit m'aonda,

c'atressim ten en balansa  
40 com la naus en l'onda.  
del mal pes que·m desenansa,  
no sai on m'esconda.  
tota noiħ me vir' e·m lansa  
desobre l'esponda :  
45 plus trac pena d'amor  
de Tristan l'amador,  
que·n sofri manhta dolor  
per Izeut la blonda.

V Ai Deus ! car no sui ironada,  
50 que voles per l'aire  
e vengues de noiħ prionda  
lai dins so repaire ?  
bona domna jauzionda,  
mor se·l vostr' amaire !  
55 paor ai que·l cors me fonda,  
s'aissi·m dura gaire.  
domna, per vostr' amor  
jonh las mas et ador !  
gens cors ab frescha color,  
60 gean mal me faitz traire !

VI Qu'el mon non a nul afaire  
don eu tan cossire,  
can de leis au re retraire,  
que mo cor no i vire  
65 e mo semblan no·m n'esclaire,  
que que·m n'aujatz̄ dire,  
si c'ades vos er vejaire  
c'ai talan de rire.  
tan l'am de bon' amor  
70 que manhtas vetz en plor  
per o que melhor sabor  
m'en an li sospire.

VII Messatgers, vai e cor,  
e di·m a la gensor  
75 la pena e la dolor  
que·n trac, e·l martire.

I        1 Non es meravelha s'eu chan  
melhs de nul autre chantador,  
que plus me tra·l cors vas amor  
e melhs sui faihz a so coman.

5        cor e cors e saber e sen  
e fors' e poder i ai mes ;  
si·m tira vas amor lo fres  
que vas autra part no·m aten.

II        Ben es mortz qui d'amor no sen  
10      al cor cal que dousa sabor ;  
e que val viure ses valor  
mas per enoi far a la gen ?  
ja Domnedeus no·m azir tan  
qu'eu ja pois viva jorn ni mes,  
15      pois que d'enoi serai mespres  
ni d'amor non aurai talan.

III        Per bona fe e ses enjan  
am la plus bel' e la melhor.  
del cor sospir e dels olhs plor,  
20      car tan l'am *eu*, per que i ai dan.  
eu que·n posc mais, s'Amors me pren  
e las charcers en que m'a mes,  
no pot claus obrir mas merces,  
e de merce no·i trop nien ?

IV        25 Aquest' amors me fer tan gen  
al cor d'una dousa sabor :  
cen vetz mor lo jorn de dolor  
e reviu de joi outras cen.  
ben es mos mals de bel semblan,  
30      que mais val mos mals qu'autre bes ;  
e pois mos mals aitan bos m'es,  
bos er lo bes apres l'afan.

V        Ai Deus ! car se fosson trian  
d'entrels faus li fin amador,  
35      e·lh lauzenger e·lh trichador  
portesson corns el fron denan !  
tot l'aur del mon e tot l'argen

i volgr'aver dat, s'eu l'agues,  
sol que ma domna conogues  
40 aissi com eu l'am finamen.

- VI           Cant eu la vei, be m'es parven  
als olhs, al vis, a la color,  
car aissi tremble de paor  
com fa la folha contra'l ven.  
45 non ai de sen per un efan,  
aissi sui d'amor entrepres ;  
e d'ome qu'es aissi conques,  
pot domn' aver almorna gran.
- VII          Bona domna, re no·us deman  
50 mas que·m prendatz per servidor,  
qu'e·us servirai com bo senhor,  
cossi que del gazardo m'an.  
ve·us m'al vostre comandamen,  
francs cors umils, gais e cortes !  
55 ors ni leos non etz vos ges,  
que·m aucizatz, s'a vos me ren.
- VIII         A Mo Cortes, lai on ilh es,  
tramet lo vers, e ja no·lh pes  
car n'ai estat tan lonjamen.

## Alegret

- I        1 Ara pareisson ll'aubre sec  
            e brunisson li elemen,  
            e vai li clardatz del temps gen,  
            e vei la bruma qi fuma,  
5      don desconortz ven pel mon a las gentz  
            e sobre totz al[s] ausells, qe·n son mec  
            per lo freg temps q'isi lur es presentz.
- II        A per pauc qe, totz vius, non sec  
            d'un gran mal qi·m fer malamen,  
10     quan mi soven de l'avol gen,  
            cui Escassedatz afuma:  
            mas qe m'en val precs ni castiamentz?,  
            q'anc albres secs frut ni flor non redesc,  
            ni malvatz homs non poc esser jausentz.
- III      15 Joven vei fals e flac e sec,  
            c'a pauc de cobeitat no·m fen:  
            qui pros fon ara s'en repen ;  
            ez es ben d'Avols escuma,  
            q'anc Proesa un dia non fon senz,  
20     e se·l bos fatz a la fin non parec  
            tot qant ha fag le seinhers es nientz.
- IV        Larguetatz se plainh d'un mal sec  
            q'a penas au ni ve vi sen;  
            ez es tan cregutz soptamen,  
25     q'ades la pel' e la pluma:  
            Escassedatz, una vertutz tenenz,  
            qe creis aitan entre·lls plus rics e crec,  
            q'uns per oc dir non aus'aibrir las denz.
- V        Aqill son dinz e defor sec,  
30     escas de fag e larc de ven,  
            e pagan home de nien,  
            ques aitals es lur costuma,  
            ez envios, volpilz e recrezentz,  
            q'entre mill un non vei ses qalqe dec,  
35     mas lo seinhor de cui es Occidentz.
- VI        Q'el non ha cor ges flac ni sec

con an pel mon poestatz cen,  
qe en lui s'apila e s'apen  
    Proeza, sivals ab pluma,  
40 per tal vola sos pretz entre ls valentz  
sobre trastotz e aug o dir a qec  
q'ell es le miells dels reis plus conoissentz.

VII                   Pe·lls maritz drutz vei tornar sec  
                        Donnei, qar l'uns l'autre consen  
45                  qi·ll sieu con laissa e l'autrui pren:  
                        el fron ll'en sors un'estruma  
qe·lli er jase mentre viva parventz,  
e coven se q'ab l'enap ab qe·ll bec  
sai lo cogos, beva lai le sufrenz.

VIII                50 Ara fenirai mon vers sec,  
                        e parra fals al non saben,  
si no·i dobla l'entendemen,  
                        q'ieu sui cell qe·lls motz escuma  
e sai triar los fals de·ls avinentz;  
55                  e si·l fals ditz q'aisi esser non dec,  
traga·s enan q'Alegres n'es girentz.

IX                   Si deguns es del vers contradizentz,  
no·t failhira, vers, de dir per qe·m lec  
de metre·n tu tres motz de divers sens

## Marcabru

- I        1 Emperaire, per mi mezeis,  
          Sai quant vostra proeza creis,  
          No·m sui jes tarzatz del venir,  
          Que Jois vos pais e Pretz vos creis,  
      5 E Jovens vos ten baud e freis  
          Que fai vostra valor doucir.
- II       Pois lo fills de Dieu vos somo  
          Que·l vengetz del ling Farao,  
          Ben vos en devetz esbaudir ;  
    10 Contra·ls portz faillon li baro,  
          Li plus de conduich e de do,  
          E ja Dieus no·ls en lais jauzir !
- III      Mais en cels de lai es remas  
          Ad ops d'Espaigna e del vas,  
    15 En devetz ben l'afan soffrir,  
          E·ls Sarrazis tornar atras,  
          E de l'aut orguoill forvenir,  
          E Dieus er ab vos al fenir.
- IV       Als Amoravis fai conort  
    20 Per las poestatz d'outra·l port  
          Qu'ant pres una tel' ad ordir  
          De drap d'enveia e de tort,  
          E ditz cadaüs qu'a sa mort  
          S' fara de sa part desvestir.
- V        25 Mas de lai n'ant blasme li ric  
          C'amon lo sojorn e l'abric  
          Mol jazer e soau dormir.  
          E nos sai, segon lo prezic,  
          Conquerrem de Dieu per afic  
    30 L'onor e l'aver e·l merir.
- VI       Trop s'en van entr'els cobeitan  
          Aicill que vergoigna non an,  
          E·s cuion ab l'aver cobrir ;  
          Et ieu dic lor, segon semblan,

- 35 Que·l cap derrier e·ls pes denan  
Los coven dels palaitz issir.
- VII            Per pauc Marcabrus non trasail  
De Joven, can per aver faill,  
E cel qui plus l'am' acuillir,  
40 Quan venra al derrier badaill,  
En mil marcs non dari' un aill,  
Si li fara la mortz pudir.
- VIII          Ab la valor de Portegual  
E del rei Navar atretal  
45 Ab sol que Barsalona·s vir  
Ves Toleta l'emperial,  
Segur poirem cridar : reial !  
E paiana gen desconfir.
- IX             Si non fosson tant gran li riu  
50 Als Amoravis for' esquiu ;  
E pogram lor o ben plevir,  
E s'atendon lo recaliu  
E de Castella·l seignoriu,  
Cordoa·il farem magrezir.
- X              55 Mas Franssa Peitau e Beiriu  
Aclina un sol seignoriu,  
Venga sai Dieu son fieu servir !
- XI             Qu'ieu non sai per que princes viu  
S'a Dieu no vai son fieu servir.

- I        1 Emperaire *per vostre prez*  
E *per la proeza q'avez*  
Sui a vos *venguz*, zo sabez,  
E no m'en dei ges penedir.
- II      5 Meillz m'en degra lo pels sezer  
Car chai vinc vostra cort vezer,  
Q'eu farai loing e pres saber  
Lo joi que vos es a venir.
- III     10 S'anc *per vos demenei orgoill*  
Tot m'es tornat en autre fuoill,  
Qe tals mena bon fait en l'uoill  
Qe no s'en auza descobrir.
- IV      15 Qi·l sa[p] bon q'eu sui tant poinenz  
Als malvats *et als recredenz*,  
15 Per qe n'a serrada[s] las denz  
E non ausa lo criz eissir ?
- V        20 Emperaire, si ben enquers,  
Lo reprovers es fis e mers :  
Ço qe dons dona e plora sers  
Las lacrimas devon perir.
- VI        (Emperaire si Dieus me gart)  
S'eu me faill al vostre donar  
Jamais a gorc qu'auza lauzar  
Non ira Marcabrunz pescar  
C'ades cuidaria faillir.
- VII     25 Per aqella fe q'eu vos dei,  
Anc mes emperador ni rei  
Non agron tal merchat de moi,  
Con vos, e D[i]eus m'en lais jauzir.
- VIII    30 Emperairiz, pregaz *per mei*,  
Qu'eu farai vostre prez richir.

- I            1    Bel m'es quan la rana chanta  
               E·l sucs pueja per la rusca,  
               Per que·l flors e·l fueilhs e·l busca  
               E·l frugz reviu en la planta,  
       5    E·l rossinhols crid' e brama  
               Sa par qu'a per joi conquisa,  
               Ples d'orgueilh car el no sen  
               Freg ni gel ni glaz ni bisa.
- II           10   Non aus so que m'atalanta  
               Dir d'una gen que·s fa cusca,  
               Cui Malvestatz franch e frusca ;  
               Qu'entre mil no·n trueb quaranta  
               De cells cui Proeza ama.  
               Qu'en un castell l'an assiza  
       15   E trazon i ben ab cen  
               Peiriers sill qui l'an revisa.
- III          Pres es lo castells e·l sala,  
               Mas qu'en la tor es l'artilla  
               On Jois e Jovens e silla  
       20   Son jutjat a pena mala ;  
               Qu'usquecs crida « fuec e flama !  
               Via dinz e sia prisa !  
               Degolem Joi e Joven  
               E Proeza si' aucisa. »
- IV          25   Senher, ben hi a gran tala  
               Si mor ses fill o ses filha !  
               Retengam per meravilha  
               Lo bec o l'ongl' o l'ala,  
               Quar de pauc albr' eis grantz rama  
       30   Quan bona pugn' i es misa,  
               Per qu'ieu n'esper e n'aten  
               Lo frut apropi la semisa.
- V           Non vueilh far paraula lonja :  
               Preza es la francha causa  
       35   E non troba fin ni pauza  
               Si no·s met reclus' o monja,  
               E pos chascus la derama

- E las denz li franch e brisa,  
Ieu non i trueb mas paren  
40 De Portogal tro en Friza.
- VI            Duc e rei senes messonja  
Ll'an primier la boca clausa,  
Qu'ill fan de pauc fag gran nauza  
Quar Donars lur fai vergonha ;  
45 Tan tem quecs que falha trama  
Per qu'en lur cortz non es visa  
Copa ni enaps d'argent,  
Mantells vairs ni pena griza.
- VII          Maritz qui l'autrui con grata  
50 Ben pot saber que'l sieus pescha  
E mostra com hom li mescha,  
Qu'ab eis lo sieu fust lo bata,  
Et aura·n tort si s'en clama,  
Car drech e raços deviza  
55 Que qui car compra car ven,  
Ar, segon la lei de Piza.
- VIII         D'aqui nais l'avols barata,  
Ric cui mortz e Dieus descresa !  
Qu'us non fai condug ni tresca;  
60 Non sia lauzenja plata  
Cell qui sa maisnad' afama ;  
Cest vest la blancha camiza  
E fai son seinhor sufren  
E ten si dons a sa guiza.
- IX            65 Alegretz, folles, en qual quiza  
Cujas far d'avol valen  
Ni de gonella camiza ?  
*(Dans M seulement.)*  
Antz co's pot ? levan cazen  
Qual gonella qual camiza.

## Peire d'Alvernhe

I        1 Abans que·l blanc pueg sion uert,  
            ni ueiam flor en la sima,  
            quan l'auzel son de chantar nec,  
            q'us contra·l freg non s'esperta,  
      5 adoncs uuelh nouelhs motz lassar  
            d'un uers, qu'entandan li melhor,  
            que·l bes entre·ls bos creis e par.

II        Per so·m plai qu'en lo temps no uert  
            mostre·s uers de razon prima  
      10 als ualens, cui sabers cossec,  
            quar esta gens mal aperta  
            non sabon ren, que·is uol leuar,  
            que sens per nulh doctrinador  
            ses bon cor no pot melhurar.

III      15 Dins es poirida e sembla uert  
            un'auols gens, que blastima  
            tot so qu'anc dreitura amec ;  
            e pus negus no s'acerta ;  
            dieus, quant pot hom en els blasmar,  
      20 qu'anc no i agron l'artelh menor  
            manht home, a cui augh pretz dar.

IV        Nuls hom del mon non a pretz uert,  
            quan uol daurar e pueys lima,  
            per qu'es fols sel que·s n'aüzec,  
      25     pos ue que bes no i reuerta ;  
            qu'a la cocha pot hom proar  
            amic de boca ses amor,  
            mas don no ues, non esperar.

V        Qui anc ui fresc iouen ni uert,  
      30     ar es mortz per gent cayma,  
            que cuja far tot lo mon sec,  
            qu'ieu non uey fol ni mamberta,  
            q'us non fassa soften son par ;  
            per so frutz torna en peior :  
      35     dous semblan ab sabor d'amar.

- VI            Ben sap far païssoer herba uert  
              femna, que l marit encrima  
              per son auol fag tener nec ;  
              d'aqui nays la gens dezerta  
40          de pretz, q'us no n auza parlar  
              mas : de mal frug mala sabor ;  
              e lh filh non uolon sordeiar.
- VII          Aissi naïsson sec e non uert,  
              q'us d'enjan non repayma ;  
45          ni anc, pos dieus Adam formec,  
              non tenc tant sa port' uberta  
              bauzia, qu'en fai manhs intrar ;  
              que lop son tornat li pastor,  
              qui degron las fedas gardar.
- VIII         50 Cobeeza a mort pretz uert,  
              qu'ensenha ls baros d'escrima ;  
              e cobezetatz s'abrazec,  
              un'arsors, que es uberta,  
              don uezem manht ric abrazar ;  
55          pretz cuion traire d'aul labor,  
              mas anc ses dieu no ui pretz car.

- I      1 Deiosta·ls breus iorns e·ls loncs sers,  
qan la blanc'aura brunezis,  
vuoil que branc e bruoill mos sabers  
d'un nou loi qe·m fruich'e·m floris;  
5      car del doutz fuoill vei clarzir los garris,  
per qe· retrai entre·ls enois e·ls freis  
lo rossignols e·l tortz e·l gais e·l pics.
- II      Contr'aïsso m'agrada·l parers  
d'amor loindan'e devezis  
10     car pauc val levars ni iazers  
a lui ses lieis cui es aclis;  
c'amors vol gaug e guerpis los enics,  
e qui s'esgau a l'ora q'es destreis,  
be·m par q'a dreit li vol esser amics.
- III     15 Q'ieu vei e crei e sai q'es vers  
c'amors engrauss'e e magrezis  
l'un ab trichar, l'autr'ab plazers  
e l'un ab plor e l'autr'ab ris;  
lo cals qe·s vol n'es manens o mendics,  
20     per qu'ieu n'am mais so qu'en ai q'esser reis  
assatz non — re d'Escotz ni de Galics.
- IV      Ges ieu non sai los capteners  
mas soffre, c'una m'a conquis  
don reviu iois e nais valers,  
25     tals que denan li·m trassaillis;  
car no m'enquier de dir, me'n ven destrics,  
tan tem qe·l mieils lais e prenda·l sordeis;  
on plus n'ai cor, mi pens: car non te'n gics?
- V      A! car si fos dels mieus volers  
30     lo sieus rics coratges devis,  
desque ma dompna·m tol poders  
de so de q'ieu plus l'ai requis !  
Mas no·ll sai dir lausengas ni prezics,  
mas meilleur cor l'ai trop que non pareis;  
35     s'ella no·l sap, morrai me'n totz antics.
- VI      Tant m'es doutz e fis sos vezers

pel ioi qe'm n'es al cor assis  
e sobre tot lo bons espers  
q'ieu n'ai, per que me'n enriquis;  
40 c'anc tant non fui mais coartz ni mendics,  
ab q'ieu la vis alques, aqui mezeis  
no'm saubes far de gran paubretat rics.

VII            So es gaugz e iois e plazers  
que a moutas gens abellis  
45            e sos pretz mont'a grans poders  
e sos iois sobreseignoris,  
q'enseignamens e beutatz l'es abrics:  
dompneis d'amor, q'en lieis s'/span e creis,  
plens de dousor, vertz e blancs, cum es nics;

VIII        50 per q'ieu mi pens: ia non te'n desrazics,  
quan mi conquis en loc on ilh me seis  
plus que se'm des Franssa lo reis Loics.  
En aquest vers sapcha vilans, Audrics,  
que d'Alvernge manda c'om ses dompneis  
55 no vai ren plus que bels malvatz espics.

## Raimbaut d'Aurenga

I        1 Er resplan la flors enversa  
pels trencans rancx e pels tertres.  
Quals flors? Neus, gels e conglapis,  
que cotz e destrenh e trenca,  
don vey morz quils, critz, brays, siscles  
pels fuels, pels rams e pels giscles;  
mas mi te vert e jauzen joys,  
er quan vey secx los dolens croys.

II              Quar enaissi o enverse  
10 que·l bel plan mi semblon tertre,  
e tenc per flor lo conglapi,  
e·l cautz m'es vis que·l freit trenque,  
e·l tro mi son chant e siscle,  
e paro·m fulhat li giscle;  
aissi·m tuy ferms lassatz en joy  
que re no vey que·m sia croy.

III              Mas una gen fad' enversa  
cum s'eront noirir en tertres,  
que·m fan trop piegz que conglapis  
q'us quecx ad sa lengua trenca  
e·n parla bas et ab siscles;  
e no·y val bastos ni giscles  
ni menassas, ans lur es joys,  
quan fan so don hom los clam croys.

IV              Quar en baizan no·us enverse,  
no m'o tolon plan ni tertre,  
dona, ni gel ni conglapi,  
mas non-poder trop m'en trenque.  
Dona, per cuy chant e siscle,  
vostre belh huelh mi son giscle  
que·m castion si·l cor ab joy  
qu'ieu non aus aver talan croy.

V              Anat ai cum cauz' enversa  
lonc temps, sercan vals e tertres,  
marritz cum hom cui conglapis  
cocha e mazelh' e trenca,

qu'anc no·m conquis chans ni siscles  
plus que·l fels clercx conquer giscles.  
Mas ar, Dier lau, m'alberga joys  
mal grat dels fals lauzengiers croys.

VI            Mos vers an, qu'aissi l'enverse  
que no·l tenhon val ni tertre,  
lai on hom non sen conglapi  
ni a freitz poder que·y trenque:  
a midons lo chant e·l siscle  
clar, qu'el cor li·n intro·l giscle,  
selh que sap gen chantar ab joy,  
que no·s tanh a chantador croy.

VII          Doussa dona, amors e joys  
nos ten ensems mal grat dels croys.

VIII         Jocclar, granre ai menhs de joy,  
quar no·us vey, e·n fas semblan croy.

## Arnaut Daniel

I        1 En breu brizara·l temps braus  
e·l biza, e·l brus e·l blancx  
qui s'entressenhon trastuig  
de sobre claus rams de fuelha:  
5        qu'ar no·i chant' auzel ni piula,  
m'ensenh'Amors qu'ieu fassa donc  
chan que non er segons ni tertz,  
ans prims d'afrancar cor agre.

II              Amors es de pretz la claus  
10      e de proeza us estancx  
don naisson tug li bon frug,  
s'es qui leialmen los cuelha,  
que un non delis gels ni niula  
mentre que·s noirirs el bon tronc:  
15      mas si·l romp trefas ni culvertz,  
peris tro leials lo sagre.

III              Falhirs emendatz es laus;  
e ieu senti·m n'ams los flancx  
que mais n'ai d'amor ses cug  
20      que tals qu'en parl' e·s n'orguelha,  
que piegz me fa·l cor de friula;  
mentre' ela·m fes semblant embronc,  
mais volgr'ieu trair pen'els dezertz  
on anc non ac d'auzels agre.

IV        25      Bona doctrina e suaus  
e cors clars, suptils e francx  
manda·m er al ferm condug  
de leis don plus vuelh que·m cuelha,  
quar, si·m fo fera e escriula,  
30      era jauzen breuja·m temps lonc,  
qu'ilh m'es plus fina e ieu lieis sertz  
que Talant' e Meleagre.

V              Tan dopti que per non-aus  
devenc soven ners e blancx;  
35      si m'a·l sen Desirs forsdug  
non sap lo cors trep o·s duelha;  
mas Jois qui d'esper m'afiula

m'encolpa quar no la somonc,  
per que sui del prec tan espertz  
40 non ai d'als talan neis magre.

VI           Pensar de liei m'es repaus,  
e tragua'm ambs los huelhs crancx  
s'a lieis vezer no·ls estug;  
e'l cor non creatz qu'en tuelha,  
45          quar orars no jocx ni viula  
no·m pot de lieis un travres jonc  
partir ... qu'ai dig? Dieu, tu m'o mertz  
o·m peris el pelac agre.

VII           Arnautz vol sos chans sia ufertz  
50          lai on douz motz moi en agre.

## **Arnaut Daniel**

I        1 Lancan vei fueill' e flor e frug  
parer dels arbres el ramel  
e aug lo chan qe fan e'l brug  
ranas el riu, el bosc l'auzel,  
5        adonc mi fueill'e·m flor'e·m fruch'Amors  
el cor tan gen qe la nueg mi ressida  
can autra gen dorm e pauz'e sojorna.

II              Er sai eu c'Amors m'a condug  
el sieu plus seguran castel  
10        don non dei renda ni trahug,  
anz m'en a fag don e chapdel;  
non ai poder ni cor qe·m vir aillors,  
q'enseniamenz e feeutatz plevida  
lai pren estar, car bons pretz s'i adorna.

III        15 Amors, de vos ai fag estug  
lonjamen verai e fizel,  
c'anc non fiz ganda ni esdug  
d'amar, anz m'era bon e bel:  
e vos faitz me dels grans afans socors,  
20        Merces, d'aitan qe'l miels aia eslida  
don par soleils jusqu'al ser qe s'ajorna.

IV              D'enjan mi tuel e d'enuuech fug  
per Amor ab qe m'atropel,  
don ai un tal ver dig adug  
25        re no sai qe mentirs espel:  
oimais pres eu ben pauc lauzenjadors  
per so q'eu voil e·m vol sil c'ai cabida  
e eu sel soi qe·ls sieus ditz non trastorna.

V               Si l'auzes dir ben saubron tug  
30        qe Jois mi monta'l cor el cel,  
car deport mi creis e desdug  
le bella qe d'amor apel:  
mon bon esper mi dobla sa valors  
car qi mai val mais dopta far faillida,  
35        ez il non es de re trista ne morna.

VI            D'aquest amor so loin fordug  
              domneador feinien fradel;  
              pero si's n'an main pretz destrug  
              tal qe's fan coinde ez isnel;  
              et eu qe soi dels leials amadors  
40          estau jauzens, c'Amors e Jois mi guida  
              lo cor en joi, qe aillors no's trastorna.

VII          Vai t'en, chanzos, a la bela de cors  
              e dijas li c'Arnautz met en oblidá  
45          tot'autr'amor per leis vas cui s'atorna.

## Thibaut de Champagne

- I      1    De fine amor vien seance et bonté,  
et amors vient de ces deus autressi.  
Tuit troi sont un, qui bien i a pensé;  
ja ne seront a nul jor departi.  
Par un conseil ont ensemble establi  
lor correors, qui sont avant alé.  
De moi ont fet tout lor chemin ferré;  
tant l'ont usé, ja n'en seront parti.
- II     9    Lo correor sunt de nuit en clarté  
et de jor sont por la gent obscurci:  
li douz regart plaisant et savoré,  
la grant biauté et li bien que g'i vi.  
N'est merveille se ce m'a esbahi:  
de li a Deus le siecle enluminé,  
car qui avroit le plus biau jor d'esté,  
les li seroit obscurs de plain midi.
- III    17   En amor a paor et hardement;  
cil dui sont troi et dou tierz sont li dui,  
et grant valor est a aus apendant,  
ou tuit li bien ont retrait et refui.  
Por c'est amors li hospitaus d'autrui  
que nus n'i faut selonc son avenant.  
J'i ai failli, dame qui valez tant,  
a vostre ostel, si ne sai ou je sui.
- IV    25   Or n'i voi plus mes qu'a lui me commandant,  
que toz pensers ai laissiez por cestui:  
ma bele joie ou ma mort i atent,  
ne sai le quel, des que devant li fui.  
Ne me firent lors si oeil point d'anui,  
ainz me vindrent ferir si doucement  
dedens le cuer d'un amoreus talent  
qu'encor i est le couz que j'en reçui.
- V     33   Li couz fi granz, il ne fet qu'enpirier;  
ne nus mires ne m'en porroit saner  
se cele non qui le dart fist lancier,

se de sa main i voloit adeser.  
Bien en porroit le cop mortel oster  
a tot le fust, dont j'ai tel desirrier;  
Mes la pointe du fer n'en puet sachier,  
qu'ele brisa dedenz au cop douner.

- VI      41     Dame, vers vos n'ai autre messagier  
              par cui vos os mon corage anvoier  
              fors ma chançon, se la volez chanter.